

大乘阿毗達磨雜集論述記卷第二

唐京兆大慈恩寺沙門窺基撰

△上來三頌讚禮所尊敘標參綜自下兩段彰前歸

歎釋頌標因於中有二初文總彰前所歸歎後段

別釋頌所標因初中有二先總解能敬相後別顯

所歸歎

今此頌中無倒稱讚最勝功德敬伸頂禮

是則初文此頌中者發端標舉簡持指斥今於此

頌以無倒心求菩提故稱揚讚歎六義三寶最勝

功德亦無倒心敬伸頂禮面揚曰稱背譽爲讚第

一名最上妙曰勝。虔恭名敬。陳設曰申。稽首接足
名為頂禮。是即頌中心無倒。語稱揚身歸禮。三輪
備。或此但說語讚身禮。顯二不邪。故皆無倒。可表
彰。故不說意業。意業亦歸。亦有倒讚及倒歸禮。故
說無倒。

以供養三寶及造此論經釋二師隨其所應

下別顯所歸歎於中有二。初別顯後釋。因此則初
也將殊兩文真法供養。故先以行供養所尊所歸。
何者。謂三寶及二師。隨有力德能為護念。所為讚
禮皆讚禮之開演等言。是讚詞故。或前頌中於三

寶所讚而亦禮於彼二師。唯禮無讚。德有分滿。總
言兼別名隨所應。

所以者何。

下釋所因。初徵後釋。此則徵詞初解。隨應釋。此徵
者。既有力德。隨皆讚禮。有何所以。唯爾非餘。後解
隨應釋。此徵者。有何所以。於三寶中讚而亦禮於
二師。所唯禮無讚。或總徵言。禮三寶等之所以者。
何謂也。非謂別徵隨所應義。

此論所依及能起故。

自下釋也。初略後廣。此則略文解。初徵者。讚禮三

寶論所依故讚禮二師能起論故由此讚禮唯爾
 非餘解後徵者三寶論依讚而亦禮二師能起但
 禮無讚或總釋此所歸禮因非為別釋隨所應義
 佛薄伽梵是契經等一切教法平等所依
 下廣釋前依起二義先釋所依佛陀覺者義如常
 釋薄伽梵者能破四魔具六種義魔謂煩惱蘊死
 及天六義者一自在二熾盛三端嚴四名稱五吉
 祥六尊貴此等廣如佛地論說何故此中雙標兩
 號不一非餘顯悟諸法舉佛陀名彰德可依標薄
 伽梵二名俱勝不一非餘其契經等十二分教無

一不依世尊方有故佛與教為平等依或由佛證
 大定正智後智大悲方能起說三身與法皆為等
 依法是佛師佛應依法如何今說佛為法依
 無師自悟諸法實性一切教起所依處故
 釋依所由最後之身證由自悟名曰無師即簡所
 餘依他悟道實性謂理由證此故後方說教彼教
 既由佛方顯說是故說佛與法為依此非師資據
 顯說故又此談教理是師故契經等教既由理有
 理則是果能證則行論皆依彼故說佛法俱為論
 依

從此無間聖弟子眾依法隨學。

顯次相依佛證法已即為弟子方便顯說名為無
間聖隨修學名法為依。諸聖弟子結集流布由是
展轉論方得起故說僧寶為論所依。

法為依者法界所流故。

釋說僧寶依法所由謂教從彼清淨法界次第展
轉平等所流依教修行後成證果或由法界流出
正法本末俱勝故聖弟子皆說依法前隨所應若
依初釋三寶於論能為所依故唯讚禮非所餘類
若依後釋三寶為依有力有德故禮亦讚或上總

釋三寶為依皆可讚禮佛具四緣性調善等如前
已說其所說法及聖弟子故皆可歸。

以上總明論所依義下述起論經釋二師

經釋二師亦契如來所說正法一分無倒聞思修行
為依止故隨而造論。

世尊所說正法甚多非唯餘聖聞能隨學二師亦
解彼之一分亦言亦僧所餘聖等契者證也一分
顯餘上位之法猶未證了未契解故或但解此所
釋經故於所契解無倒聽聞思惟修行滿足由此
三慧為所依止隨所聞等而造此論此意即彰依

釋而說。故知此論定契正理。若依初釋。隨其所應。此論既由二師方起。故別讚禮。不讚禮餘。依後釋者。二師但解起此論。教非勝。依止唯禮。無讚。或此總說。由彼二師。契如來所說一分三慧。無倒為所依止而起此論。故恭讚之。非是別釋。隨所應義。雖有三解。初後順文。三慧門義。如別章說。此以總文彰前歸歎。而不指示參糅。所以次下別釋。頌所標因。此中有二。初別釋前六義。三寶後別解釋。序起所因。初中有二。初總指前佛六義。頌逐難釋。故後別散牒。隨文指釋。隨標釋。故

初二頌顯示如來應正等覺勝德六義。所謂自性因果業相應差別義。

此即初也。別總讚禮。合有二頌。此中並標。故言初二。四句為頌。由此定然。下別釋中。但於六義。別總讚禮。不過六故。顯示何別。顯說指示文義名體。有差別。故如來等者。舉六義尊菩薩地。說言無虛妄。故名如來。語如其義。已來成佛為如來。故涅槃經云。如過去佛說契經等。從波羅蜜三十七品。十一空等來。至涅槃。故名為如來。此意說言。如諸佛等。而說妙法。從彼修萬行來。至涅槃。故言不虛。是如

來義。又言不虛常行諦語來至佛位故名如來。成
 唯識言應已害賊應不受生應受供養是故名應。
 涅槃亦言應害世間應離煩惱應受天人種種供
 養此等並通三乘應釋佛應有異應害二障應無
 二死應受世間財寶供養。瑜伽論說已得應得應
 為福田應為供養是故名應。瑜伽初一則此初二
 瑜伽後二則此後一。若說供言便無餘義。瑜伽又
 言如其勝義覺諸法故名正等覺。此釋但覺勝義
 為名涅槃經言正者不顛倒徧知者於四顛倒無
 不通達此經亦但說觀諦理得徧知名如實義者。

於一切境外道邪知今知名正。二乘分達今達二
 我名等等謂平等菩薩知未滿亦未名等知。今總
 簡持名正等覺餘之七名如瑜伽論第三十八第
 八十二涅槃十七及第十八大般若經成實論佛
 性論廣說既有十號何故舉三。此顯斷恩及智德
 故異門分說如來總名包餘九號應是共德。正等
 覺者是不共德。此舉總別共不共德徧故非餘。由
 此諸經但言多陀阿伽度等勝德六義者佛本體
 名自性修學證相名因已證滿相名果起作用相
 名業與功德俱名相應性體用異名差別佛地論

等皆俱分別

下別散牒隨文指釋於中有二初牒六義屬文散釋當知以下屬釋法僧別亦通歸讚初文有六釋六義故。一文中各各有二初牒頌文以六義屬後方總釋頌義之意。

諸會真淨究竟理者顯自性義謂諸佛法身以一切種轉依真如為體性故。

此中諸會至自性義此即初牒頌以六義屬謂諸佛下總釋頌義下皆準知更不復釋一切種者謂諸有漏種類差別或即一切二障種子轉此有漏

麤重所依得非麤重真如所依此論下說轉依有三。一心二道三者麤重心轉依者謂法性心永離客塵故名為轉麤重轉依謂本識內煩惱隨眠皆永遠離由因滅故果亦隨無又下自釋自性身言以一切障轉依真如為法身體故此所言一切種者因諸有漏轉此麤重所得心依則是諸佛共有自體名自性義眾德依止亦名法身故佛法身以此所得轉依為性又一切種者即諸有為能依止法類別多故名一切種此所依止轉依真如是自性體自性難知舉能依止以顯所依令易解故又

諸佛法身解諸會義種轉依解淨義一切轉依解
究竟義真如顯真義體性顯理義隨其所應別釋
前頌其轉依義後當廣釋。

超聖行海昇彼岸者顯因義謂佛菩提從一切種極
喜等十地聖行無量無數大劫圓滿修習因所生故
菩提有二。一智二斷。此智菩提從因生故。一切種
者十地聖行。一乘三乘自一乘中種類眾多由此
名海。此順梵本故卽如是依此文句應言從極喜
等十地一切種聖行劫謂時分若依大劫阿僧企
耶因位經三數日月等無量阿僧祇大劫方滿阿

僧祇卽無數或無量者卽是無數無數卽是阿僧
祇耶要三阿僧祇大劫修行因便方滿謂佛菩提
經無數劫修於十地一切種聖行因圓滿方始得
生。此顯時長所修行廣圓滿修習果方生故若不
圓修果必不生顯果所從故名因義。又佛菩提解
彼岸義一切種至無數劫解聖行海時長顯廣行
多彰深因所生言解超昇義亦隨所應別屬前頌。
又一切種者所經眾位無位不經舉十地者別顯
勝位。一切種通一切無量無數劫聖行解海義劫
有三無數非無量故。大劫是時亦得同上解。十地

名義下文自釋。

證得一切法自在者顯果義。

此牒頌文以六義別屬遂利於因故名爲果。

謂永斷一切煩惱障所知障及彼餘習。

總釋頌義將釋證得先顯所因謂由斷障方證得

故障涅槃惑名煩惱障覆所知境令智不生名所

知障體卽種現習者卽是因障所有無堪任性故

瑜伽論第五十說佛由斷此名斷習氣菩薩地說

斷此名三住斷簡異二乘故故別稱習成唯識中

已廣分別二障體義如佛地論第七卷成唯識第

九卷別章等說

證得無邊希有功德無上三菩提果於一切法自在

轉故。

正釋頌文證得等義三菩提者所證得體無邊希

有無上三言皆讚歎詞無邊者廣多義希有者難

遇義無上者最勝義三菩提者正覺義由斷障習

便證廣多難遇功德最勝覺果此義卽顯證得一

切功德法自在起或由斷除障習盡故證得希有

無上菩提於諸境中正後二智成十自在自在而

起此顯於境得自在故如頌中釋功德無量但說

菩提以智為主覺最勝故增減字義別配頌文準

釋可解故不別屬。

善權化導不思議者顯業義。

此以六義屬諸佛化用故稱為業。

謂以超非一切智境神通記說教誠變現等無量調

伏方便。

此釋善權不思議義除佛以外一切皆名非一切

智二乘等起此三輪等是彼所知名為彼境佛三

輪等化用廣深非彼所知名非彼境由非彼境稱

不思議非彼所知及言議故十輪經說佛三勝輪

不共一切故不思議佛能應物現三輪等巧妙無

方立善權稱。此神通變者謂神境神變記心者謂

記說神變教誠者謂教誠神變菩薩地言此三神

變卽是三通謂神境智通知心差別通漏盡智通

六通之中具當分別三輪略以四門分別一出體

二釋名三廢立四辨相一出體者依瑜伽論六十

九說前五神通異生有學起者有漏道勢劣故無

學起者皆是無漏道勢強故。此中但說如來所起

唯是無漏漏盡智通卽彼論說盡及無生二智為

性唯是無漏。此言但說緣漏盡故。或亦通說漏盡

身成他心智等並無漏故。前五神通漏盡相續所
成就故皆名無漏。非無學身不成無漏。由此卽顯
此中三輪唯是無漏。三皆世間由漏盡輪教誡他
故。此三唯依諸靜慮地意識相應後得智中智慧
爲性。卽彼又說神通等一切靜慮以爲依止皆能
引故。無色雖亦有漏盡智。諸菩薩等隨以彼心了
一切法亦能依彼變諸境等如佛邊立等作用狹
故而不名通。色界心廣除未至地可有諸通定慧
均故。瑜伽旣說三輪卽通故同於通。非在餘地。
釋名者智具威德修所成果作用難測名之爲神。

轉易不定稱之爲變。變者是境。神者是智。變之神
能變也。神之變所變也。皆依主釋。神卽變變屬能
變持業釋。此中但取初及第三釋。輪者摧伏義。摧
伏他身邪見等故。神變卽輪持業釋也。心謂他心
種種差別記者別也。識也。別識彼心名曰記心。雖
亦能記他之心。所心是主故。但說記心。心之記故
亦依主釋。記心卽輪亦持業釋。教謂教示令其善
生。誠謂誠勸令其惡滅。教卽是誠教。誠卽輪皆持
業釋。三廢立者。聲聞地說由現神變令他於己生
尊重。心能屬耳聽。由記說故。記別其心行相差別。

爲說妙法。由教誡故。如其根行。隨所悟入。能正教
 誡。或未發心。爲作神變。不修正行。記別其心。未有
 證獲。而爲教誡。又身意語。如其次第。三業化故。故
 此三輪。非增非減。四辨相者。菩薩地說。初神變相。
 略有二種。一能變。二能化。能轉所餘。有自性物。令
 成餘物。名爲能變。隨欲化爲。曾未有事故。名能化。
 能變者。謂十八變。一振動。二熾然。三流布。四示現。
 五轉變。六往來。七卷八舒。九眾像入身。十同類往
 趣。十一顯。十二隱。十三所作自在。十四制他神通。
 十五能施辯才。十六能施憶念。十七能施安樂。十

八放大光明。能化者。此有三種。謂化爲身。或化爲
 境。或化爲語。化爲身者。化自他身。似他自身。或一
 或多。如是等類。化爲境者。化似未尼飲食資具。諸
 如是等。化爲語者。妙音。麤音。繫屬自他。如是一切。
 次記心相。差別有五。一記有纏。有隨眠。離纏。離隨
 眠心。二記有染。邪願。無染。正願心。三記欲。色。無色。
 五趣等心。四以一記。一以一記。多心。五諸佛菩薩
 記。諸有情。諸根。勝劣。種種勝解。種種界行。隨應安
 處。涅槃行中。教誡相者。或說有五。所謂遮止。開許。
 諫誨。呵擯。慶慰。或卽此中。示導等五。此三輪義。廣

如十地論第四卷十輪第六卷瑜伽第二十五第
二十七別章等說。示導者舊經所說示教利喜也。
或說五句謂令離欲。示現教導讚勵慶喜顯揚論
第十二說。訶毀諸行。令離愛染名令離欲。示現四
種真實道理名為示現。已得信解令正受行名為
教導。若彼退屈策發令進名為讚勵。彼隨法行讚
令忻悅名為慶喜。彼論又說有令離欲而非示現
說惡令厭不教作善。有唯示現不令離欲。示德令
修不遮彼過。俱句可知。未學令學名教導。未進令
進名讚勵。慶喜有五廣如彼說。五種皆是教誠之

相。此中唯舉修善四門。不說令離欲。或此但說示
導二種等。彼餘三及佛地經十作業等。一切皆是
此善權攝。無量調伏方便者。顯揚第三及第八說
無量有五。一有情界無量。謂一足等。或地獄等六
十四類。二世界無量。謂十方界。三法界無量。謂善
不善等。四所調伏界無量。謂三乘性等五十五類。
前有情界通有無性。此唯有性。故二差別。五調伏
方便界無量。謂隨所宜。或現神變。或現記說。或現
教誠。一切善巧調伏之法。菩薩悲慧本為有情。有
情必依住處受化。彼由諸法成其染淨。故觀幾類

甚至涅槃最後乃施方便善巧故五無量不減不增。此等義門廣如別章及彼論說。調謂和御。伏謂制攝。方便即是善巧之義。由此即以三種神變調和控御。制伏攝受名為善權。即無量中調伏方便界無量也。三輪示導出善權體。指此類等有無數量調伏方便。非調伏等別配三輪。

導引可化有情令心界清淨故。

釋化導義。可化有情簡非無性。五無量中所調伏界之無量也。以彼能調伏所調伏。心界即是法性真如界者。性義心本性故。或依他心自體名界。以

三輪等如是無量調伏方便導引於彼可化有情令真心界離客障染斷依他心得清淨故。

無量希有勝功德者。顯相應義。謂超尋思數量無邊種種難行苦行所生無上大悲力無畏等功德法實相應故。

超尋思者非四尋思。此四唯在見道前位。彼位修因非唯所超。由此超者隨應超。但非彼智境皆是。此超義數量者。以行無邊過算數故。超過此二故曰無邊。因行非一。稱為種種捨頭目等不易名難。此行逼迫故言苦行。顯因無量希有故。所生果更

無量希有。謂由因此無邊勝行。故生大悲力無畏等。亦復無邊。名有與如是等法寶相應。言相應者。謂總假者與別實德俱。或成就義總成別德。故或果順正。因性常俱。有更相順義。此中但說受用相應。如前已解。言所生故。或此舉所生。由證法身能起化用。三皆具足。文唯舉報。此中且舉二種無邊。窮空盡際。略而不說。大悲十力四無畏等。第十四卷下文當釋。

自他並利所依止者。顯差別義。謂如來受用變化身。如其次第。自他並利所依故。

此中有二。初總屬頌。下別解釋。此初文也。次配可知。

所依者身義體義無差別也。

下別解釋文。有其三。初解所依次解三利。後結差別。此解所依。成唯識說體依聚義。總說名身故。所依言體身無別。

自他並利所依者。就勝而說。

此解三利。初總釋意。後別釋之。此總釋意。所說三利。就勝而說。非理定爾。至下當知。

謂受用身自利最勝處。大會中能受第一。廣大甚深。

法聖財故

下別解釋就勝所因。會有一種自受用身居自法
 會居他會者。他受用身皆能領受最勝第一廣大
 甚深法聖財故。唯自利攝。瑜伽等說聖財有七。謂
 信戒慚愧聞捨慧。彼據用勝。且言七種。今說功德
 聖者資什皆名聖財。處大會中並生樂故。據實此
 身亦實他利。受樂增勝。不同化身多起通化。從自
 受用。不說利他。佛地論說通二利故。由此論有就
 勝說言。受法樂增名為受用。又處大會謂自廣大
 法性之會。故唯自利身。

變化身者。他利最勝。徧於十方一切世界。能起無間。
 猶工巧業等諸變化事。建立有情所應作故。
 猶者譬如義工巧業者。謂幻術事。佛變化身隨形
 利物無而忽有。幻術不殊。幻事既由工巧智起。故
 舉彼喻以顯化身。又工巧業能化眾緣像化身亦
 爾。故舉為喻。等彼幻術論說等言。佛地論說身三
 化中為摧諸伎傲慢眾生。故如工巧。此身頓於一
 切世界。能為無間相續現起。沒已復生。建立應化
 無暫休息。故唯他利。形隨樂現。名變化身。

自性身者。謂諸善逝共有法身。

菩薩地說上昇最極永不退還故名善逝。初句是善後是逝義已到名逝。故不退還或上昇者亦是逝。故唯識等說諸受用變化各別。因感各別。自性實有差別。但無別執。同處相似。利樂意樂事業平等。說無差別。唯自性身諸佛共有。故言善逝共有法身。

最極微細一切障轉依真如為體故。

唯障佛果故極微細。種習非一名一切障。即彼法身轉捨一切二障種習。麤重所依。以所轉得無麤重。依真如為體。故餘十地所得真理。不名法身。一

切障習猶未盡故。

於自他利並為最勝。由證此身得餘身故。

自體難知二利之相舉。由得此有餘二身二利差別顯通二利。佛地論說此自性身寂滅安樂正屬自利。為增上緣通益眾生故屬利他。又與二身俱利。依故二利所攝同彼復釋約用顯。故復此中就勝說故。

此三佛身是差別義。

于文第三曲結差別。三身略以三門分別。一出體。二釋名。三廢立。一出體者初自性身以諸如來真

淨法界受用變化所依爲體。具足無邊眞常功德。佛地論說體常無變成。唯識言諸法實性。或是諸佛共有自體。名自性身。大功德法所依止。故亦名法身。勝鬘經言不離煩惱藏。名如來藏。離煩惱時。名法身故。雖亦有說鏡智爲體。然非正義。故不敘之。次受用有二類別。一自受用。三無數劫修集資糧所起無邊眞實功德。至極圓淨常徧色身。卽四智品一切實德以爲體性。自受法樂。名受用身。雖亦有說中二智品爲此身體。然非正義。故此不說。二他受用。由平等智於純淨土爲大菩薩所示現。

身以爲體性。令他受法樂。亦名受用身。據理而說。四智心品爲大菩薩所現。佛身爲他受用。說法斷疑。現自在者。觀察智故。平等所依本質身者。鏡智境故。現大神通成事智故。又佛四智境用徧故。然平等智於現此身作用最強。擊圓鏡智現身平等。故論偏說其理。定然不爾。此身應無本質。斷疑說法。現通起化後。變化身由成事智於淨穢土爲未登地。一切有情隨彼所宜。所現形類以爲體性。爲益有情。示現種種變化。事故名變化身。理實此身四智所現化境爲體。然此相麤順成事智故。論偏

說此論報化不彰於智。又理定然。此解為勝。或復此身及他受用各一智現。足利有情。不假所餘。故論不說二釋名者。法身一名。唯依主釋法之身故。其自性身。或持業釋。自性即身故。或有財釋。以自性為身故。其受用身。唯持業釋。若變化身。亦有二種。由能變化者。謂成事智等。以所變化為身名。變化身。有財釋名。若所變化即身。持業釋也。三廢立者。所證能證。真俗理事。本有修生。性相差別。立初二身。自利利他。自體作用。能變所變。慧悲所增大。小差別。別立化身二對義門。各有無量。不可說一。

雖多義別。種類唯爾。不可說多。又性相用。如世間身。有體形。能故立三身。非增非減。所餘義門。如勝鬘經。楞伽經。解深密經。涅槃法華攝大乘。瑜伽論。讚佛論。般若論。成唯識佛地論。三身論。別章等說。

上牒六義屬文。散釋下釋。法僧亦通歸讚。

當知此中亦讚法僧功德。

初總後別。此總屬文。此中意說。前以六義讚佛之內。通讚法僧。顯初三寶。既通攝讚。後歸禮中。故總歸禮。何者。法僧言亦通讚。出斯於後三寶通歸。

法寶者。自性因果等義。所攝故。

此顯所讚法寶之體。自性卽理。因是行果如自名。
業義通教相應差別。卽上可知。故言等義法寶所
攝。由此六義亦通讚法。離此更無一乘法故。
僧寶者隨此修學所生故。

顯所讚中僧寶之相卽是所超聖行海因。故不說
佛入僧中所收。又次前章說佛薄伽梵教法所依
俱依法學。故依此法修生曰僧。所學之法旣在讚
中。能學之僧亦已通讚。離此更無一乘僧。故雖前
真理卽同體僧。恐讚不周。故舉別體。或顯一乘法
離佛體無學一乘道僧。離佛體有。故舉讚此隨學。

之僧。此讚非凡。前言聖故。一乘三寶旣通讚。故歸
禮中並通歸禮。由此卽顯所禮所讚該同別相不
徧。二乘又釋前讚。一乘理智可稱。非餘乘故。後於
歸禮總禮三乘有力等心皆可歸。故前後影顯。故
不相違。由此反彰頌言如是貫通三寶。指讚歸故。
三寶略以三門分別。一出體。二釋名。三廢立。一出
體者。初佛寶體卽前三身。真非真佛皆此攝。故法
寶有四。教法寶者謂善無漏聲名句文。如前廣說。
雖有漏聲等亦教法寶。性菩薩聲等並有漏。故然
非此中教法寶體。此中但說真教法故。理法寶者

謂因四諦二空所顯真如為性。行法寶者謂通三乘諸無漏行。雖有漏行亦行法寶。此行非真。故今不說果法寶者。謂有無餘二涅槃界及菩提智無住涅槃以為自體。此中通說三乘所有教理行果為法寶性。真法非真並通說。故僧寶者謂聖眾一切無漏有為無為成眾聖法。由此麟角獨覺三根皆僧寶攝。僧種類故許彼眾多同時出。故菩薩二根亦復如是。有漏身器為無漏依供養及損。故生罪福。然有漏身非僧寶體。此中通說三乘聖眾真僧非真並皆說。故勝鬘經說僧者即是三乘眾。故

就此復有一乘二乘。一乘佛者即初二身。法寶亦四教謂詮辨一乘教法。理謂二空所顯真理。行謂有為無漏萬行。果謂佛位菩提涅槃。僧寶者謂十地菩薩等所有諸無漏法。此皆通說有為無為直往回心一乘無漏為三寶體。二乘者佛即變化身亦為二乘現化身。故不為十地現此身故。既詮彼教名彼教法為彼現身。故彼佛攝法亦有四教。謂詮彼二乘教法。理謂四諦理等所顯真如。行謂彼所修無漏智等。果謂彼所證菩提涅槃。僧謂二乘住果住向諸無漏法。於一乘中復有二種。謂同體

別體同體者。謂真如覺性。故覺依。故名佛寶。解深
 密說。菩提及斷。皆名菩提。故諸處說。為自性身故。
 能持自相。即名為法。教行果三。所依止。故法寶。所
 攝。理無乖諍。復由證此。成菩薩等。亦僧寶收。此等
 證文。如前已說。別相三寶。亦如次前。一乘二乘三
 寶別故。前來且說。真實三寶。住持三寶。相易可知。
 恐厭煩文。故略應止。一釋名者。可貴可珍。稱之為
 寶。總名帶數。別名持業。既易可知。由此不述。三廢
 立者。何故三寶。非減非增。略有四義。一僧祇律云。
 為翻外道邪三寶故。二寶性論云。依三義。故一調

御師。二彼師法。三彼師資。三寶性論。又說為菩薩
 上根。說有佛寶。願作佛故。為獨覺。中根。說有法寶。
 求自然智。達緣起故。為聲聞。下根。說有僧寶。求從
 他聞。作弟子故。四處處皆說。佛如良醫。法如妙藥。
 僧如看者。故此三寶。不減不增。所餘義門。如別章
 說。此中三寶。種類有多。頌中所明。讚歸何者。一乘
 非餘。六義。即法僧隨學。故餘無力。故或通讚禮三
 乘三寶。彼離此等。無讚禮故。勝鬘經說。波羅提木
 叉毗尼。出家受具足等。為大乘。故彼二乘者。入於
 一乘。又彼所學。菩薩皆修。故彼法僧。今皆讚禮。又

無朋黨等讚禮故。此但讚禮別相非餘說。僧隨法
 修學生故。或通讚禮同相別相同相易知。故論不
 說。又唯禮讚真實三寶。住持無力無救助故。或通
 讚禮真實住持。住持相易。故論不說。並皆有力能
 救助故。三寶門義。如前頌中歸禮所指諸經論說。
 上別釋前六義三寶。下別解釋敘起所因。

庶令學者無諸怖畏。方造論端。建茲體性。

此文解釋序起所因。庶望也。端。序也。建立也。茲。此
 也。此意說言。我今冀望令諸學者於此論中無諸
 怖畏。方造論序。讚禮所尊。憑力請加立三寶性。又

於論端歸讚三寶顯體尊高。超諸聖眾。令後學者
 心生欣慰。無怖畏故。建此論序。上來安慧讚揚三
 寶歸禮所尊。敘參糅意。卽是第一讚揚歸敘分。
 下述兩文。正申參糅。卽是第二集述本文分。第二
 分中大文有二。初以一頌總標一部分品。後隨前
 標分品次第別釋。

本事與決擇。是各有四種。三法攝應成諦法。得論議
 此頌總標一部分品。頌文旣少。寄品以明。非此頌
 文。唯三法義。此論總有二分八品。二分者何。初本
 事分。後決擇分。八品者何。是二分中各有四種。本

事四者。一三法。二攝。三相應。四成就。決擇四者。一
 諦。二法。三得。四論議。此有何因。總為二分。本事分
 中略廣分別諸法體事。決擇分中略廣決擇深隱
 要義。又一切法略有二種。一自性。二差別。初宗明
 自性。後宗明差別。又陳法義不過二種。一所成。二
 能成。前宗明所成。後宗明能成。又教所明總有三
 種。謂境。行。果。初宗明境。後明行。果。果依行。成。行能
 生果。二極相順。合一明之。又此雖釋阿毗達磨經
 然依瑜伽集諸要義。謂初本事分集彼論中本地
 文義。後決擇分集彼論中決擇文義。彼攝釋分解

經儀則彼異門分釋經名義。彼攝事分攝三藏事。
 彼初二分無義不釋。集彼文義攝法已周。後三非
 要隨二演之故。不可別集。由如是等種種所因。故
 說二分非增非減。復以何義各成四品。菩薩藏經
 第十七卷辨中邊論說十善巧。一蘊。二界。三處。四
 緣起。五處非處。六根。七世。八諦。九乘。十有為無為
 善巧。此十皆是菩薩所觀。依略廣中辨釋諸法。三
 攝已盡。更不假餘。又是三乘方便通觀。所以偏說
 令彼觀故。又由此論云。欲令學者得二利益。初說
 蘊等。故論初辨三法品。雖辨三法。諸門體義。然未

知彼體義寬狹須彰寬狹次明攝品寬狹之義雖
 已了知性相順違仍未明達為知違順次辨相應
 所不相應則是違故雖復了知順違體用諸法得
 失尙未解了為知得失次明成就所不成就則是
 失故由是等義本事分中分為四品此前四品並
 是所觀依境起修須觀諦理故初決擇即明諦品
 雖知所詮總觀諦行能詮及妙行猶未了知為知
 及起修次明法品此前二品依境起行行必有果
 次明得品雖已證獲未明慧解顯正摧邪利他無
 畏為成彼事故次明論議品體品既四義品亦然

不減不增唯定成八。此中諸品各從勝名彼諸品
 中有餘法故。

上來一頌總標一部二分八品。以下隨前所標分
 品次第別釋。初分四品分之為二三法體也餘三
 義也又分既有二品各成四隨標所明更不科釋
 幾何因取相建立與次第義喻廣分別集總頌應知
 此上二頌無著論本。

三法品中大文有四。初以九義辨釋三科。二以三
 性辨釋三科。三以相等四門辨釋三科。四以外等
 六義辨釋三科。至下當知不煩預指。初九門義文

復有三。初以頌標。次隨別釋。第五卷云。由此所說
 差別道理。餘無量門。可類觀察。後類指結。
 此則初也。頌上三句。列九名。別下之一句。標集勸
 知。九門義者。一幾舉數。列名門。二何因問答。廢立
 門。三何取問答。別名門。四何相問答。體性門。五何
 建立問答。差別門。六何次第問答。前後門。七何義
 問答。釋名門。八何喻問答。譬況門。九何廣分別問
 答。諸義門。上一何言貫通。下八幾。卽是問。故何不
 通。何者。問辭。故或隨所應。喻中無問。問但通七。今
 且略指。隨應當知。

下釋前標九種門義。文勢有二。初覺師子假興問
 答。論端先辨三科。所由二隨九門。一別顯就初
 有二。先問後答。

問何故論端先辨蘊等。

此則問辭爲何義。故於論端。首先辨三科。不彰餘
 法。

下答有三。初略。次徵。後廣。別釋。

答欲令學者於幾何因等諸思。擇處得善巧故。

此初略答。思謂思量。則止觀品。擇謂擇簡。則論議
 者。此二皆是能思擇也。處謂處所。卽所思擇九門。

是也善謂勝妙巧謂巧便即是方便意言論首先辨三科欲令思擇精勤修學者於幾何因等前九門義所思擇中獲得勝妙巧方便故以智慧生長所以者何

此徵所由令於此等得其善巧之所以者何謂也未究了故

由此善巧能得二種稱讚利益所謂作意稱讚利益論議決擇稱讚利益

下廣別釋文復有二初總後別此即總文稱謂稱揚面談其實讚謂讚歎背譽其美言作意者即是

止觀相應作意各於彼境能持心住或能數數警覺彼心作用勝故止觀二品立作意名論議決擇即是其他議論諸法此總義言由此論初辨三科法令止觀者於思擇處得勝方便斷諸煩惱自利滿足既自歡喜稱揚讚歎他人亦復稱讚其美若利他者談論法義於思擇處既得善巧自生喜讚亦令他人斷諸煩惱讚揚美故此二增長現後安樂名二利益或稱讚者談此二種順理益物可稱可讚言其勝益之甚非說自他面背稱讚
作意稱讚利益者謂善順增長奢摩他毗鉢舍那故

自下別釋上二利益先解自利。又復有二。此即總
 牒別開二門。正釋利益奢摩他者。此翻為止。即等
 引位。略有九種。謂內攝心令等住等毗鉢舍那。此
 翻為觀。謂簡擇法極簡擇等。略有四種。此等如下
 第十卷說。謂由九門辨三科法為境界故。聞思修
 起令彼止觀圓滿成就。境勝順心。或因順果故名
 善順增長止觀。止觀皆是所增長法。
 善順增長奢摩他者。謂於如是諸思擇處已作善巧
 得無疑故。
 此釋止增先彰斷惑。由於三科起聞思慧已得善

巧令疑惑等障定煩惱皆不得生。以疑為初例包
 一切。
 隨其所樂於一境界正觀現前心易定故。
 正明止增由得聞思方便善巧無疑等故。隨其行
 者所樂之法。十善巧中於一境界起聞思慧無倒
 觀察起現在前定易生故。
 善順增長毗鉢舍那者。以無量門觀察一切所知境
 界速令正慧究竟滿故。
 此釋觀增。謂此論初總以九門別以無量門觀察
 一切所應知境界。境順心故速令學者無倒三慧究

竟成滿。或聞思因順修慧果觀真現慧名正慧。故
 此二止觀通有無漏世出世間。唯定非散。凡聖皆
 得究竟。能得一切智果自利滿故。速令正慧究竟
 滿者。謂無漏慧。

論議決擇稱讚利益者。由於如是諸思擇處善通達
 故。成就一切問答自在於諸異論得無所畏。

此解利他。謂由於彼九門體義得無漏慧善通達
 故。便能成就問答自在於餘一切異談論中。或餘
 一切異論教中善能通達得無所畏。由此三科攝
 法盡故。九門廣釋體義同故。

大乘阿毗達磨雜集論述記卷第二

校勘 四左三行
 不另行